



Broj: 01-50-1-15-36/16

Sarajevo, 19.10.2016.



## ZAPISNIK

### 36. sjednice Predstavničkog doma Parlamentarne skupštine Bosne i Hercegovine, održane 19.10.2016.

Sjednica je počela u 10, 05 sati. Prisustvovalo je 37 poslanika.

Odsustvo su opravdali: Staša Košarac, Šemsudin Mehmedović, Jasmin Emrić, Aleksandra Pandurević i Momčilo Novaković.

Sjednici su prisustvovali članovi Vijeća ministara BiH i Ureda Brčko Distrikta BiH u Vijeću ministara BiH.

Iz međunarodnih organizacija sjednicu su pratili predstavnici OHR-a, OSCE-a i EUSR-a, a iz nevladinih organizacija prisustvovali su predstavnik CCI-ja i Transparency Internationala u BiH, te predstavnik američke ambasade u BiH.

\*\*\*\*\*

Predsjedavajući Doma Mladen Bosić rekao je da će poslanicima, u skladu s članom 171. Poslovnika, na početku sjednice, a prije rasprave o dnevnom redu, biti omogućeno postavljanje poslaničkih pitanja u usmenoj formi.

U skladu s članom 172. Poslovnika, najave za postavljanje poslaničkih pitanja u usmenoj formi dostavili su sljedeći poslanici:

- **Mirsad Mešić** - ministru komunikacija i prometa BiH
- **Dužanka Majkić** - ministrici odbrane BiH
- **Maja Gasal -Vražalica** – ministru vanjskih poslova BiH
- **Nikola Lovrinović** - ministru pravde BiH
- **Saša Magazinović** - ministru komunikacija i prometa BiH
- **Mensura Beganović** – Vijeću ministara BiH
- **Amir Fazlić** - ministru komunikacija i prometa BiH
- **Senad Šepić** – predsjedavajućem Vijeća ministara BiH
- **Salko Sokolović** – ministru vanjskih poslova BiH
- **Hanka Vajzović** - predsjedavajućem Vijeća ministara BiH

Ove najave su, u skladu s članom 168. Poslovnika, dostavljene predsjedavajućem Vijeća ministara BiH i onom članu Vijeća ministara BiH na kojeg se pitanje odnosi. Predsjedavajući je podsjetio na to da je osiguran direktan TV prijenos ovog dijela sjednice, u skladu s članom 171. stav (1) Poslovnika.

Nakon ovih napomena, pristupilo se usmenom postavljanju poslaničkih pitanja i davanju odgovora redoslijedom dostavljanja najava.

#### **Mirsad Mešić**

*Pitanje upućeno ministru komunikacija i prometa BiH:* „Pitao sam ministra prometa i komunikacija da li je u proceduri donošenje Zakona o upotrebi i korištenju bespilotnih letjelica, tzv. dronova. Nekakav odgovor sam dobio, pa evo ne znam šta ću danas i dobiti.”<sup>1</sup>

**Zamjenik ministra komunikacija i prometa BiH Saša Dalipagić dao je odgovor. Poslanik Mirsad Mešić izrazio je nezadovoljstvo odgovorom.**

#### **Dušanka Majkić**

*Pitanje upućeno ministrici odbrane BiH:* „Poznato je da se u Republici Turskoj već 20 godina nalazi pet helikoptera i to četiri naoružana i jedan helikopter za obuku koji pripadaju Oružanim snagama BiH. Moje pitanje glasi – Kakav je status ovih naoružanih helikoptera, zašto se još uvijek nalaze u Turskoj i kakvi su planovi za njihovo rješavanje? Također, zanima me zašto se na spisku neperspektivne vojne imovine, definirane Odlukom Predsjedništva BiH iz 2009. godine, vode samo helikopteri Mi-24, odnosno zašto navedenom odlukom Predsjedništva BiH nije obuhvaćeno 125 ... borbenih sredstava i rezervnih dijelova koje je utvrdila komisija Ministarstva odbrane koja je napravila uvid na licu mjesta u 2014. godini? Također, da li je o ovom raspravljala nadležna komisija Ministarstva odbrane za rješavanje viškova pokretne vojne imovine i kakvi su prijedlozi za rješavanje ove problematike?”<sup>2</sup>

**Zamjenik ministrice odbrane BiH Boris Jerinić dao je odgovor. Poslanica Dušanka Majkić zatražila je odgovor u pisanoj formi.**

**Maja Gasal – Vražalica** najavila je kašnjenje, te nije prisustvovala ovom dijelu sjednice.

#### **Nikola Lovrinović**

*Pitanje upućeno ministru pravde BiH:* „Zašto Tužilaštvo BiH ne odgovara na postavljena pitanja poslanika? Da je tako, navodim primjere postavljenih pitanja koja Vam u prilogu dostavljam:

- pitanje u vezi sa istragama ubistva povratnika i policajaca u općini Travnik – postavljeno 7.7.2015.;
- pitanje o svjedocima – postavljeno 7.9.2015.;
- pitanje postavljeno 2.12.2015.;
- urgencija na pitanje o svjedocima – postavljeno 18.12.2015.;
- pitanje o toku istrage o zločinima u općini Travnik – postavljeno 28.12.2015.;
- pitanje o ubistvu Ive Ivoša – postavljeno 13.1.2016.

Tražim da se na postavljena pitanja dostave odgovori, bez ikakve namjere da insistiram na odgovoru koji bi eventualno remetio ili ugrožavao sudske postupke.

**Nikola Lovrinović izrazio je nezadovoljstvo zbog neprisustva ministra sjednici, kao i zbog nedobivanja odgovora na više pitanja od Tužilaštva BiH i FTV-a BiH. Rekao je da će pitanje ponoviti na narednoj sjednici na kojoj bude omogućeno postavljanje pitanja u usmenoj formi.**

<sup>1</sup> Izvod iz neautoriziranog transkripta 36. sjednice Predstavničkog doma Parlamentarne skupštine BiH

<sup>2</sup> Izvod iz neautoriziranog transkripta 36. sjednice Predstavničkog doma Parlamentarne skupštine BiH

### **Saša Magazinović**

*Pitanje upućeno ministru komunikacija i prometa BiH:* „Dakle, obijesna ili bahata vožnja se nalazi u zakonodavstvu zemalja regije. I u to vrijeme sam smatrao da treba uvrstiti i u naše zakonodavstvo, budući da ubistva na cesti koja se dešavaju iz obijesti su sve češća i češća. Moje pitanje je – da li u Ministarstvu razmišljaju da i ovo reguliraju zakonom i šta su ostale aktivnosti, pored onoga što su u izmjenama Zakona naveli, što imaju namjeru mijenjati u Zakonu o sigurnosti saobraćaja, ali i Krivičnog zakona kako bi bar malo sklonili ili ublažili uticaj ubica na ulici.”<sup>3</sup>

**Zamjenik ministra komunikacija i prometa BiH Saša Dalipagić dao je odgovor. Poslanik Saša Magazinović komentirao je dati odgovor.**

### **Mensura Beganović**

*Pitanje upućeno Vijeću ministara BiH:* „Da li su zakonski propisi kojima je regulirana zaštita autorskih prava usklađeni s evropskim direktivama za oblast autorskih prava? Da li je Institut za intelektualno vlasništvo dostavio godišnji izvještaj o primjeni ovih zakona za period poslije 2012. godine?“

**Kratko je komentirao ministar vanjske trgovine i ekonomskih odnosa BiH Mirko Šarović. Poslanica Mensura Beganović zatražila je odgovor u pisanoj formi.**

### **Amir Fazlić**

*Pitanje upućeno ministru komunikacija i prometa BiH:* „Ko u Bosni i Hercegovini provodi ispite za sticanje stručne osposobljenosti upravitelja prijevoza, početno i periodično stručno osposobljavanje, na koji način i u kojem postupku je izabran, te na koji način vrši i koliko puta je Ministarstvo izvršilo nadzor i kontrolu nad radom izabrane organizacije, počev od davanja odobrenja za obavljanje tih poslova? Pitanje se odnosi na međunarodni drumski prijevoz te osposobljavanje i vozača.

**Poslanik Amir Fazlić zatražio je odgovor u pisanoj formi.**

**Senad Šepić** uputio je pitanje predsjedavajućem Vijeća ministara BiH Denisu Zvizdiću. Predsjedavajući nije prisustvovao sjednici, pa je poslanik Senad Šepić rekao da će pitanje postaviti na narednoj sjednici na kojoj bude omogućeno postavljanje pitanja u usmenoj formi.

**Salko Sokolović** uputio je pitanje ministru vanjskih poslova BiH Igoru Crnatku. Ministar nije prisustvovao sjednici, pa je poslanik Salko Sokolović rekao da će pitanje postaviti na narednoj sjednici na kojoj bude omogućeno postavljanje pitanja u usmenoj formi.

### **Hanka Vajzović**

*Pitanje upućeno Vijeću ministara BiH:* „Na osnovu kojeg međunarodnog ugovora ili domaćeg propisa službe za graničnu kontrolu već godinama svakodnevno omogućavaju uvoz smeća u našu državu i njegovo deponiranje u zaleđu Neuma i to toliko blizu gradske jezgre da Neumljani i turisti svake godine imaju problem s gušenjem dimom od požara koji su na

<sup>3</sup> Izvod iz neautoriziranog transkripta 36. sjednice Predstavničkog doma Parlamentarne skupštine BiH

ovoj deponiji redovna prateća pojava svake sezone? Ako se zna da je zakonom zabranjen uvoz smeća, šta će Vijeće ministara BiH poduzeti da ovakva praksa prestane? „

**Odgovor je dao ministar vanjske trgovine i ekonomskih odnosa BiH Mirko Šarović, te rekao da će odgovor dostaviti i u pisnoj formi. Poslanica Hanka Vajzović zahvalila se na kvalitetnom odgovoru.**

\*\*\*\*\*

U vezi sa izmjenama i dopunama dnevnog reda sjednice, predsjedavajući je napomenuo sljedeće:

S dnevnog reda skinute su:

**Tačka 4.** Prijedlog zakona o izmjeni Zakona o plaćama i naknadama u institucijama Bosne i Hercegovine, predlagač: poslanik Damir Arnaut, zakon broj: 01-02-1-1950/16, od 18. 7. 2016. (drugo čitanje), na zahtjev Komisije za finansije i budžet,

**Tačka 18.** Davanje saglasnosti za ratifikaciju Sporazuma o finansiranju Programa razvoja konkurentnosti u ruralnim područjima (RCDP) između Bosne i Hercegovine i Međunarodnog fonda za poljoprivredni razvoj, broj: 01,02-05-2-2243/16, od 18.8.2016. i

**Tačka 22.** Davanje saglasnosti za ratifikaciju Prvog amandmana na Sporazum o finansiranju (Projekat registracije nekretnina) između Bosne i Hercegovine i Međunarodne asocijacije za razvoj, broj: 01,02-05-2-2462/16, od 21.9.2016., na zahtjev Komisije za vanjske poslove BiH.

Dopunjene su:

**Tačka 6.** Prijedlog zakona o izmjenama i dopunama Zakona o akcizama u Bosni i Hercegovini, predlagač: Vijeće ministara BiH, zakon broj: 01,02-02-1-1853/16, od 7.7.2016., skraćeni postupak, s **Mišljenjem Komisije za finansije i budžet,**

**Tačka 7.** Prijedlog zakona o izmjeni Zakona o sistemu indirektnog oporezivanja u Bosni i Hercegovini, predlagač: Vijeće ministara BiH, zakon broj: 01,02-02-1-1854/16, od 7.7.2016., skraćeni postupak, s **Mišljenjem Komisije za finansije i budžet i**

**Tačka 8.** Prijedlog zakona o izmjenama i dopuni Zakona o uplatama na jedinstveni račun i raspodjeli prihoda, predlagač: Vijeće ministara BiH, zakon broj: 01,02-02-1-1855/16, od 7.7.2016., skraćeni postupak, s **Mišljenjem Komisije za finansije i budžet.**

Na dnevni red dodate su:

**Tačka 22.** Davanje saglasnosti za ratifikaciju Sporazuma između Bosne i Hercegovine i Vlade Republike Turske o saradnji u vojnoj obuci, broj: 01,02-05-2-2567/16, od 4.10.2016. i



**Tačka 23.** Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Republike Makedonije o kolokaciji diplomatsko-konzularnih predstavništava, broj: 01,02-05-2-2568/16, od 4.10.2016.

Nakon ovih napomena, predsjedavajući je otvorio raspravu o dnevnom redu sjednice.

U raspravi su učestvovali: Denis Bećirović, Predrag Kožul, Hanka Vajzović i Nikola Lovrinović.

Nakon rasprave, predsjedavajući je konstatirao da 36. sjednica Predstavničkog doma ima sljedeći

### **DNEVNI RED**

1. Usvajanje Zapisnika 35. sjednice Predstavničkog doma Parlamentarne skupštine BiH;
2. Komentari na dobivene odgovore na poslanička pitanja;
3. Prijedlog zakona o obilježavanju malog oružja, lakog naoružanja i pripadajuće municije – „E“, predlagač: Vijeće ministara BiH, zakon broj: 01,02-02-1-1361/16, od 9.5.2016., i 10.6.2016. (drugo čitanje), skraćeni postupak;
4. Prijedlog zakona o dopunama Zakona o parničnom postupku pred Sudom BiH, predlagač: Vijeće ministara BiH, zakon broj: 01,02-02-1-609/16, od 18.3.2016. (drugo čitanje);
5. Prijedlog zakona o izmjeni i dopunama Zakona o Pravobranilaštvu Bosne i Hercegovine, predlagač: Vijeće ministara BiH, zakon broj: 01,02-02-1-2091/16, od 2.8.2016. (prvo čitanje);
6. Prijedlog zakona o izmjenama i dopunama Zakona o akcizama u Bosni i Hercegovini, predlagač: Vijeće ministara BiH, zakon broj: 01,02-02-1-1853/16, od 7.7.2016., skraćeni postupak, s Mišljenjem Komisije za finansije i budžet;
7. Prijedlog zakona o izmjeni Zakona o sistemu indirektnog oporezivanja u Bosni i Hercegovini, predlagač: Vijeće ministara BiH, zakon broj: 01,02-02-1-1854/16, od 7.7.2016., skraćeni postupak, s Mišljenjem Komisije za finansije i budžet;
8. Prijedlog zakona o izmjenama i dopuni Zakona o uplatama na jedinstveni račun i raspodjeli prihoda, predlagač: Vijeće ministara BiH, zakon broj: 01,02-02-1-1855/16, od 7.7.2016., skraćeni postupak, s Mišljenjem Komisije za finansije i budžet;
9. Prijedlog zakona o izmjenama i dopunama Zakona o udruženjima i fondacijama Bosne i Hercegovine, predlagač: Vijeće ministara BiH, zakon broj: 01,02-02-1-2194/16, od 5.8.2016. (prvo čitanje);
10. Prijedlog zakona o izmjenama i dopunama Zakona o upravi Bosne i Hercegovine, predlagač: Vijeće ministara BiH, zakon broj: 01,02-02-1-2275/16, od 26.8.2016. (prvo čitanje);
11. Izvještaj o zbrinjavanju lica pod međunarodnom zaštitom u Bosni i Hercegovini za 2015., podnosilac: Ministarstvo za ljudska prava i izbjeglice BiH, broj: 01,02,03-41-1987/16, od 22.7.2016.;
12. Informacija o prihvatu i integraciji bosanskohercegovačkih državljana koji se vraćaju u Bosnu i Hercegovinu na osnovu Sporazuma o readmisiji za period 1.1.2015. –

- 31.12.2015., podnosilac: Ministarstvo za ljudska prava i izbjeglice BiH, broj: 01,02,03-41-1986/16, od 22.7.2016.;
13. Inicijativa poslanika Predraga Kožula i Nikole Lovrinovića za razmatranje tačke: „Evropski dan sjećanja na žrtve svih totalitarnih i autoritarnih režima“, akt broj: 01-50-1-2269/16, od 24.8.2016.;
14. Davanje saglasnosti za ratifikaciju Sporazuma o saradnji u oblasti turizma između Vijeća ministara BiH i Vlade Republike Kipar, broj: 01,02-05-2-2229/16, od 15.8.2016.;
15. Davanje saglasnosti za ratifikaciju Sporazuma o grantu između Bosne i Hercegovine i Razvojne banke Vijeća Evrope u vezi s regionalnim programom stambenog zbrinjavanja, broj: 01,02-05-2-2240/16, od 18.8.2016.;
16. Davanje saglasnosti za ratifikaciju Protokola između Vijeća ministara BiH i Vlade Republike Slovenije o provođenju Sporazuma između Evropske zajednice i Bosne i Hercegovine o readmisiji lica koja borave bez dozvole, broj: 01,02-05-2-2241/16, od 18.8.2016.;
17. Davanje saglasnosti za ratifikaciju Sporazuma o grantu br. TF0A0656 (Projekat za jačanje finansijskog upravljanja i kontrole) između Bosne i Hercegovine i Međunarodne banke za obnovu i razvoj/Međunarodne asocijacije za razvoj (Svjetska banka), broj: 01,02-05-2-2244/16, od 18.8.2016.;
18. Davanje saglasnosti za ratifikaciju Sporazuma između Vijeća ministara BiH i Vlade Republike Poljske o zaštiti tajnih podataka, broj: 01,02-05-2-2245/16, od 18.8.2016.;
19. Davanje saglasnosti za ratifikaciju Sporazuma o osnivanju Fonda Zapadnog Balkana, broj: 01,02-05-2-2246/16, od 18.8.2016.;
20. Davanje saglasnosti za ratifikaciju Izmjena i dopuna Statuta i njegovog aneksa (Pravila finansiranja) koji je usvojila Generalna skupština od osnivanja Svjetske turističke organizacije (UNWTO), broj: 01,02-05-2-2479/16, od 23.9.2016.;
21. Davanje saglasnosti za ratifikaciju Ugovora o finansiranju između Bosne i Hercegovine i Evropske investicione banke – *Modernizacija puteva u Federaciji BiH*, broj: 01,02-05-2-2480/16, od 23.9.2016.;
22. Davanje saglasnosti za ratifikaciju Sporazuma između Bosne i Hercegovine i Vlade Republike Turske o saradnji u vojnoj obuci, broj: 01,02-05-2-2567/16, od 4.10.2016.,
23. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Republike Makedonije o kolokaciji diplomatsko-konzularnih predstavništava, broj: 01,02-05-2-2568/16, od 4.10.2016.

\*\*\*\*\*

#### **Ad.1. Usvajanje Zapisnika 35. sjednice Predstavničkog doma Parlamentarne skupštine BiH**

Nakon uvodnih napomena predsjedavajućeg, nije bilo prijavljenih za raspravu.

Zapisnik 35. sjednice usvojen je s 35 glasova „za“ (iz Federacije BiH 24, iz Republike Srpske 11), bez glasova „protiv“ i jednim glasom „suzdržan“.

## **Ad.2. Komentari na dobivene odgovore na poslanička pitanja**

Predsjedavajući je podsjetio da su, u skladu s članom 170. Poslovnika, do ove sjednice Doma pitanja u pisanoj formi postavili poslanici:

- Damir Bećirović - uputio pitanja Visokom sudskom i tužilačkom vijeću BiH
- Maja Gasal-Vražalica - uputila inicijativu Vijeću ministara BiH
- Nikola Lovrinović - postavio pitanje JP Autoceste FBiH, Instituciji ombudsmena za zaštitu potrošača u BiH i Ministarstvu finansija i trezora BiH
- Damir Arnaut - postavio pitanje Ministarstvu vanjskih poslova BiH, te Vijeću ministara BiH i agentu Vijeća ministara BiH pred Evropskim sudom za ljudska prava
- Jasmin Emrić - postavio pitanje Državnoj komisiji za integrirano upravljanje granicom BiH
- Hanka Vajzović - uputila inicijativu Kolegiju Doma.

Sadržaj postavljenih pitanja i inicijativa je sljedeći:

### **Damir Bećirović**

#### Pitanja postavljena Visokom sudskom i tužilačkom vijeću BiH:

„Da li je Visoko sudsko i tužilačko vijeće BiH donijelo neke zaključke u vezi s postupkom odabira i imenovanja nosilaca pravosudnih funkcija u BiH, a koji se ogledaju u tome da određeni kandidat, iako se nalazi na rang-listi, odnosno ispunjava uslove propisane zakonima i podzakonskim aktima, neće biti uzet u razmatranje, odnosno neće biti imenovan na pravosudnu funkciju ako nema određeni broj bodova koji ste vi „dodatno odredili“?

Ako je istina da je Visoko sudsko i tužilačko vijeće BiH usvojilo ovakvu „internu politiku“ imenovanja, molim da me obavijestite o tome na kojoj sjednici je usvojena ovakva politika, u skladu s kojim propisom, da li se radi o pismenoj ili usmenoj odluci, te da mi je dostavite s obzirom na to da nije objavljena na zvaničnom portalu VSTV-a, kao i da mi dostavite stenogram sa sjednice Vijeća na kojoj je usvojena.“

### **Maja Gasal - Vražalica**

#### Inicijativa upućena Vijeću ministara BiH:

„Zadužuje se Vijeće ministara BiH da u okviru svojih godišnjih izvještaja o radu dostavi informacije o stanju ravnopravnosti spolova za svako ministarstvo pojedinačno u sklopu Vijeća ministara BiH.“

### **Nikola Lovrinović**

#### Pitanje postavljeno JP Autoceste FBiH:

1. „S obzirom na ustavne odredbe o službenim jezicima u Bosni i Hercegovini, kada će se u nazivu tunela na dionici autoputa A1 Sarajevo – Zenica uz naziv „1. mart“ naći i nazivi tunela na drugim službenim jezicima?“

#### Pitanje postavljeno Instituciji ombudsmena za zaštitu potrošača u BiH

1. „Molio bih vas da mi, kao jedna od institucija za zaštitu prava potrošača, odgovorite na pitanje o ispravnosti naplate računa za RTV taksu preko telefonskog ili bilo kojeg drugog računa.“

Pitanje postavljeno Ministarstvu finansija i trezora BiH:

1. „Ko je i na osnovu čega donio odluku o tome da je gornja granica za priznavanje svakodnevnih troškova prijevoza s posla i na posao nabavkom mjesečne karte ili refundiranjem stvarnih troškova mjesečne karte 80 kilometara i kada će ta diskriminatorna odluka biti promijenjena prema onima čije je mjesto prebivališta udaljeno od mjesta rada preko 80 kilometara?

**Damir Arnaut**

Pitanje postavljeno Ministarstvu vanjskih poslova BiH

1. „Koliko je akata/dopisa supstantivne prirode (iz domena rada Sektora za bilateralne odnose i Sektora za multilateralne odnose, odnosno kabineta ministra i zamjenika ministra, sekretara, Odjela za međunarodu naučnu, tehničku, obrazovnu, kulturnu i sportsku saradnju, Ureda za posebne diplomatske aktivnosti) svaki pojedinačni DKPBiH dostavio prema sjedištu MVP-a BiH u 2013., 2014. i 2015. godini?“

Pitanje postavljeno predsjedavajućem Vijeća ministara BiH i agentici Vijeća ministara BiH pred Evropskim sudom za ljudska prava:

1. „Molim da me obavijestite o argumentaciji koju je Bosna i Hercegovina, konkretno Ured agenta Vijeća ministara BiH pred Evropskim sudom za ljudska prava, predložila pred tim sudom u predmetima *Sejdić i Finci protiv Bosne i Hercegovine* i *Zornić protiv Bosne i Hercegovine*, odnosno da mi dostavite podneske koje je navedeni ured predložio Evropskom sudu tokom postupka u tim predmetima.“

**Jasmin Emrić**

Pitanje postavljeno Državnoj komisiji za integrirano upravljanje granicom Bosne i Hercegovine:

1. „Koje aktivnosti su vođene u ovoj godini, šta je urađeno, te u kojoj je fazi realizacija poslaničke inicijative broj: 01-50-1-1471/15, od 17.11.2015., koja je usvojena na 21. sjednici Predstavničkog doma, održanoj 10.12.2015.?“

Tokom sjednice pitanja i inicijative u pisanoj formi postavili su poslanici:

- **Denis Bećirović** – uputio inicijativu Kolegiju Predstavničkog doma PSBiH
  - **Senad Šepić** – postavio pitanja Zajedničkom kolegiju oba doma PSBiH i Centralnoj izbornoj komisiji BiH, te uputio jednu inicijativu Vladi Federacije BiH,
  - **Damir Arnaut** – uputio pitanje ministru pravde BiH.
- Sadržaj postavljenih pitanja i inicijativa je sljedeći:

**Denis Bećirović**

Inicijativa upućena Kolegiju Predstavničkog doma PSBiH:

"Zadužuje se Vijeće ministara BiH da, najkasnije u roku od 90 dana od dana usvajanja ove inicijative u Predstavničkom domu Parlamentarne skupštine BiH, pripremi i u pralamentarnu proceduru dostavi Prijedlog izmjena i dopuna Ustava BiH kojim se osigurava potpuno i dosljedno provođenje presude Evropskog suda za ljudska prava u predmetu *Sejdić i Finci*."



## **Senad Šepić**

### Pitanje postavljeno Zajedničkom kolegiju oba doma PSBiH:

1. „U kojoj je fazi realizacija zaključka Predstavničkog doma PSBiH za formiranje Interesorne radne grupe za izmjenu Poslovnika PSBiH?“

### Pitanje postavljeno Centralnoj izbornoj komisiji BiH:

1. „Molim da mi dostavite informaciju o načinima i mogućnostima osiguravanja glasanja u zdravstvenim ustanovama u BiH i koliko je lica, na dan glasanja i izbora iskoristilo to pravo na izborima 2014., a koliko 2016. godine?“

### Inicijativa upućena Vladi Federacije BiH:

1. „Predlažem da u procesu osiguravanja uravnoteženog razvoja u BiH, u okviru procedure za usvajanje izmjena i dopuna Zakona o akcizama u BiH, a koje se odnose na povećanje akciza na naftne derivate, biogorivo i biotečnosti, utvrdite princip i prioritet utroška sredstava iz Direkcije za ceste FBiH, u regije Unsko – sanski kanton, Tuzla i Goražde, s obzirom na udaljenost i odsječenost od autoputa na Koridoru 5c. Na taj način bi se, u konačnici, osiguralo da se BiH, u oblasti cesta približno ravnomjerno razvija, što bi morala biti naša zajednička obaveza i opredjeljenje.“

## **Damir Arnaut**

### Pitanje postavljeno ministru pravde BiH:

1. „Uzimajući u obzir da je Parlamentarna skupština Vijeća Evrope usvojila Rezoluciju o saradnji s Međunarodnim krivičnim sudom (MKS), Rezolucija br. 2134, od 12.10.2016., kojom poziva sve članice Vijeća Evrope da „potvrde svoje opredjeljenje za MKS kroz ... ratifikaciju bez daljnjeg odlaganja ... amandmane usvojene u Kampali ukoliko to već nisu uradile...“, da je Bosna i Hercegovina jedna od samo 17 članica Vijeća Evrope (od ukupno 47) koja je u članu 4. navedene rezolucije eksplicitno prozvana jer još nije ratificirala te amandmane, kada će Ministarstvo pravde BiH, u saradnji s MVP-om BiH, početi aktivnosti u pravcu ratifikacije ovih amandmana, odnosno u pravcu ispunjenja zahtjeva iz Rezolucije br. 2134 Parlamentarne skupštine Vijeća Evrope?“

Predsjedavajući je rekao da su do današnje sjednice dostavljeni sljedeći odgovori na poslanička pitanja:

- Na pitanje **Mensure Beganović**, postavljeno u usmenoj formi na 34. sjednici, odgovor dostavilo Ministarstvo vanjske trgovine i ekonomskih odnosa BiH
- Odgovore na pitanja **Senada Šepića**, postavljena u pisanoj formi na 29., 32. i 34. sjednici i odgovore na dvije poslaničke inicijative, dostavilo Vijeće ministara BiH
- Odgovor na pitanja **Mirsada Donlagića**, postavljena u pisanoj formi na 35. sjednici i odgovor na inicijativu, dostavilo Vijeće ministara BiH, te na pitanja postavljena u pisanoj formi na 36. sjednici, odgovor dostavio Kolegij Sekretarijata PSBiH
- Na pitanje **Jasmina Emrića**, postavljeno na 34. sjednici, a u vezi s poslaničkom inicijativom, odgovor dostavilo Vijeće ministara BiH
- Na pitanje **Mirsada Mešića** postavljeno u pisanoj formi na 34. sjednici, a u vezi s poslaničkom inicijativom, odgovor dostavilo Vijeće ministara BiH
- Na pitanja **Aleksandre Pandurević**, postavljena u pisanoj formi, odgovore dostavilo Vijeće ministara BiH
- Na dopunsko pitanje **Salka Sokolovića** odgovor dostavilo Vijeće ministara BiH

- Na dopunska pitanja **Damira Arnauta**, postavljena na 29. sjednici, odgovore dostavilo Vijeće ministara BiH
- Na pitanje **Damira Bećirovića**, postavljeno u pisanoj formi u pripremi 36. sjednice, odgovor dostavilo Visoko sudsko i tužilačko vijeće BiH
- Na inicijativu **Hanke Vajzović**, odgovor dostavilo Vijeće ministara BiH i Kolegij Doma dostavio odgovor na inicijativu
- Na pitanje **Maje Gasal-Vražalice**, postavljeno u pisanoj formi u pripremi 36. sjednice, odgovor dostavilo Ministarstvo vanjskih poslova BiH i obavještenje po poslaničkoj inicijativi dostavilo Vijeće ministara BiH
- Na pitanje **Nikole Lovrinovića**, postavljeno u pisanoj formi u pripremi 36. sjednice, odgovor dostavilo JP Autoceste FBiH

Dostavljene odgovore komentirali su poslanici: Nikola Lovrinović, Mensura Beganović, Mirsad Đonlagić, Damir Arnaut i Damir Bećirović.

**Nikola Lovrinović** izrazio je nezadovoljstvo odgovorom dobivenim od JP Autoceste FBiH, kao i zbog nedobivanja odgovora od RTV-a Federacije BiH i Ministarstva za ljudska prava i izbjeglice BiH. Također, predložio je usvajanje zaključaka. Predsjedavajući je rekao da poslovnički nije moguće predlagati zaključke u okviru ove tačke, te rekao da će se prijedlozi zaključaka proslijediti Zajedničkoj komisiji oba doma Parlamentarne skupštine BiH za izradu Prijedloga izmjena i dopuna Poslovnika Predstavničkog doma i Doma naroda Parlamentarne skupštine BiH, odmah po njenom osnivanju.

**Mensura Beganović** kratko je komentirala odgovor Ministarstva vanjske trgovine i ekonomskih odnosa BiH i izrazila zadovoljstvo dobivenim odgovorom.

**Mirsad Đonlagić** komentirao je odgovor Ministarstva civilnih poslova BiH, u vezi s inicijativom o usvajanju pravilnika o akademskim zvanjima.

**Damir Arnaut** izrazio je nezadovoljstvo odgovorima Vijeća ministara BiH, kao i nedobivanjem odgovora na postavljena poslanička pitanja od Vijeća ministara BiH, ali i drugih organa uprave BiH.

**Damir Bećirović** komentirao je odgovor Visokog sudskog i tužilačkog vijeća BiH, u vezi sa izborom i imenovanjem kandidata na pravosudne pozicije.

**Ad.3. Prijedlog zakona o obilježavanju malog oružja, lakog naoružanja i pripadajuće municije – „E“, predlagač: Vijeće ministara BiH, zakon broj: 01,02-02-1-1361/16, od 9.5.2016., i 10.6.2016. (drugo čitanje), skraćeni postupak**

Predsjedavajući je dao uvodne napomene i otvorio raspravu. Nije bilo prijavljenih.

Dom je, s 31 glasom „za“ (iz Federacije BiH 25, iz Republike Srpske šest), pet „protiv“ i bez glasova „suzdržan“, **usvojio** u drugom čitanju Prijedlog zakona o obilježavanju malog oružja, lakog naoružanja i pripadajuće municije.

**Ad.4. Prijedlog zakona o dopunama Zakona o parničnom postupku pred Sudom BiH, predlagatelj: Vijeće ministara BiH, zakon broj: 01,02-02-1-609/16, od 18.3.2016. (drugo čitanje)**

Predsjedavajući je dao uvodne napomene i otvorio raspravu. Diskutirao je Šefik Džaferović.

Dom je, s 23 glasa „za“ (iz Federacije BiH 18, iz Republike Srpske pet), pet „protiv“ i osam glasova „suzdržan“, **usvojio** u drugom čitanju Prijedlog zakona o dopunama Zakona o parničnom postupku pred Sudom BiH, s dva amandmana, koji glase:

**Amandman I.**

U članu 1. Prijedloga zakona o dopunama Zakona o parničnom postupku pred Sudom BiH kojim se dodaje novi član 20a. u stavu (1) riječi: „dužno je“ zamjenjuju se riječju „može“. Stav (2) briše se. Dosadašnji st. (3), (4), (5), (6), i (7) postaju st. (2), (3), (4), (5), i (6). Stav (8) briše se. Dosadašnji stav (9) postaje stav (7).

**Amandman II.**

U članu 2. Prijedloga zakona o dopunama Zakona o parničnom postupku pred Sudom BiH, koji se odnosi na član 34. stav (1), nova tačka 9) mijenja se i glasi:

„9) da je tužba podnesena protiv Bosne i Hercegovine prije donošenja odluke Pravobranilaštva Bosne i Hercegovine po podnesenom zahtjevu za mirno rješenje spora ili je podnesena prije isteka roka od tri mjeseca od njegovog podnošenja.“

**Ad.5. Prijedlog zakona o izmjeni i dopunama Zakona o Pravobranilaštvu Bosne i Hercegovine, predlagatelj: Vijeće ministara BiH, zakon broj: 01,02-02-1-2091/16, od 2.8.2016. (prvo čitanje)**

Nakon uvodnih napomena, otvorena je rasprava. Nije bilo prijavljenih.

Dom je, s 25 glasova „za“ (iz Federacije BiH 19, iz Republike Srpske šest), šest „protiv“ i pet glasova „suzdržan“, **usvojio** u prvom čitanju Prijedlog zakona o izmjeni i dopunama Zakona o Pravobranilaštvu Bosne i Hercegovine.

**Ad.6. Prijedlog zakona o izmjenama i dopunama Zakona o akcizama u Bosni i Hercegovini, predlagatelj: Vijeće ministara BiH, zakon broj: 01,02-02-1-1853/16, od 7.7.2016., skraćeni postupak, s Mišljenjem Komisije za finansije i budžet**

Nakon uvodnih napomena, otvorena je rasprava. U raspravi su učestvovali: Šefik Džaferović, Dušanka Majkić, Damir Bećirović, Predrag Kožul, Saša Magazinović, Salko Sokolović, Damir Arnaut, Amir Fazlić, Fehim Škaljić, Nikola Špirić i Senad Šepić.

Domu se obratio ministar finansija i trezora BiH Vjekoslav Bevanda.

Dom je, s 22 glasa „za“ (iz Federacije BiH 12, iz Republike Srpske 10), 14 „protiv“ i jednim glasom „suzdržan“, **usvojio** negativno mišljenje Komisije za finansije i budžet Predstavničkog doma, čime je Prijedlog zakona o izmjenama i dopunama Zakona o akcizama u Bosni i Hercegovini **odbijen** (čl. 113. stav (2) Poslovnika).

**Ad.7. Prijedlog zakona o izmjeni Zakona o sistemu indirektnog oporezivanja u Bosni i Hercegovini, predlagač: Vijeće ministara BiH, zakon broj: 01,02-02-1-1854/16, od 7.7.2016., skraćeni postupak, s Mišljenjem Komisije za finansije i budžet**

Nakon uvodnih napomena, otvorena je rasprava. Nije bilo prijavljenih.

Dom je, s 24 glasa „za“ (iz Federacije BiH 13, iz Republike Srpske 11), 12 „protiv“ i jednim glasom „suzdržan“, **usvojio** negativno mišljenje Komisije za finansije i budžet Predstavničkog doma, čime je Prijedlog zakona o izmjeni Zakona o sistemu indirektnog oporezivanja u Bosni i Hercegovini **odbijen** (čl. 113. stav (2) Poslovnika).

**Ad.8. Prijedlog zakona o izmjenama i dopuni Zakona o uplatama na jedinstveni račun i raspodjeli prihoda, predlagač: Vijeće ministara BiH, zakon broj: 01,02-02-1-1855/16, od 7.7.2016., skraćeni postupak, s Mišljenjem Komisije za finansije i budžet**

Nakon uvodnih napomena, otvorena je rasprava. Nije bilo prijavljenih.

Predsjedavajući je dao na glasanje Mišljenje Komisije za finansije i budžet. „Za“ je glasalo 19 poslanika (iz Federacije BiH 9, iz Republike Srpske 10), 13 je bilo „protiv“ i pet „suzdržanih“. Mišljenje nije dobilo potrebnu entitetsku većinu. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 19 glasova „za“, 14 „protiv“ (iz Federacije BiH 13, iz Republike Srpske jedan) i četiri glasa „suzdržan“, Dom je **usvojio** negativno mišljenje Komisije za finansije i budžet Predstavničkog doma, čime je Prijedlog zakona o izmjenama i dopuni Zakona o uplatama na jedinstveni račun i raspodjeli prihoda **odbijen** (čl. 113. stav (2) Poslovnika).

**Ad.9. Prijedlog zakona o izmjenama i dopunama Zakona o udruženjima i fondacijama Bosne i Hercegovine, predlagač: Vijeće ministara BiH, zakon broj: 01,02-02-1-2194/16, od 5.8.2016. (prvo čitanje)**

Predsjedavajući je dao uvodne napomene i otvorio raspravu. Diskutirali su Nikola Lovrinović i Zaim Backović.

Dom je, s 25 glasova „za“ (iz Federacije BiH 19, iz Republike Srpske šest), tri „protiv“ i devet glasova „suzdržan“, **usvojio** u prvom čitanju Prijedlog zakona o izmjenama i dopunama Zakona o udruženjima i fondacijama Bosne i Hercegovine.

**Ad.10. Prijedlog zakona o izmjenama i dopunama Zakona o upravi Bosne i Hercegovine, predlagač: Vijeće ministara BiH, zakon broj: 01,02-02-1-2275/16, od 26.8.2016. (prvo čitanje)**

Predsjedavajući je dao uvodne napomene i otvorio raspravu. Nije bilo prijavljenih.

Dom je, s 25 glasova „za“ (iz Federacije BiH 19, iz Republike Srpske šest), jednim „protiv“ i 11 glasova „suzdržan“, **usvojio** u prvom čitanju Prijedlog zakona o izmjenama i dopunama Zakona o upravi Bosne i Hercegovine.



**Ad.11. Izvještaj o zbrinjavanju lica pod međunarodnom zaštitom u Bosni i Hercegovini za 2015., podnosilac: Ministarstvo za ljudska prava i izbjeglice BiH, broj: 01,02,03-41-1987/16, od 22.7.2016.**

Predsjedavajući je dao uvodne napomene i otvorio raspravu. U raspravi su učestvovali Nikola Lovrinović i Milica Marković.

Domu se obratila ministrica za ljudska prava i izbjeglice BiH Semiha Borovac.

Dom je, s 28 glasova „za“ (iz Federacije BiH 22, iz Republike Srpske šest), bez glasova „protiv“ i devet glasova „suzdržan“, **usvojio** Izvještaj o zbrinjavanju lica pod međunarodnom zaštitom u Bosni i Hercegovini za 2015.

**Ad.12. Informacija o prihvatu i integraciji bosanskohercegovačkih državljana koji se vraćaju u Bosnu i Hercegovinu na osnovu Sporazuma o readmisiji za period 1.1.2015. – 31.12.2015., podnosilac: Ministarstvo za ljudska prava i izbjeglice BiH, broj: 01,02,03-41-1986/16, od 22.7.2016.**

Nakon uvodnih napomena, predsjedavajući je otvorio raspravu. Nije bilo prijavljenih.

Dom je, s 27 glasova „za“ (iz Federacije BiH 21, iz Republike Srpske šest), bez glasova „protiv“ i deset glasova „suzdržan“, **primio k znanju** Informaciju o prihvatu i integraciji bosanskohercegovačkih državljana koji se vraćaju u Bosnu i Hercegovinu na osnovu Sporazuma o readmisiji za period 1.1.2015. – 31.12.2015.

**Ad.13. Inicijativa poslanika Predraga Kožula i Nikole Lovrinovića za razmatranje tačke: „Evropski dan sjećanja na žrtve svih totalitarnih i autoritarnih režima“, akt broj: 01-50-1-2269/16, od 24.8.2016.**

Nakon uvodnih napomena, predsjedavajući je otvorio raspravu. U raspravi su učestvovali: Nikola Lovrinović, Predrag Kožul, Damir Arnaut, Denis Bećirović, Zaim Backović i Senad Šepić.

Predsjedavajući je dao na glasanje prijedlog zaključka Predraga Kožula i Nikole Lovrinovića. S pet glasova „za“ (iz Federacije BiH), 27 „protiv“ i pet glasova „suzdržan“, Dom **nije usvojio** prijedlog zaključka, koji glasi:

*„Predstavnički dom Parlamentarne skupštine BiH povodom 23. augusta, Evropskog dana sjećanja na žrtve totalitarnih i autoritarnih režima, izražava saučešće i pijetet prema ovim žrtvama, te zadužuje Vijeće ministara BiH da najkasnije u roku od 30 dana Parlamentarnoj skupštini BiH dostavi tekst deklaracije koja će sadržavati odnos Parlamentarne skupštine BiH, odnosno Bosne i Hercegovine prema sljedećim aktima:*

- *Rezoluciji Vijeća Evrope 1096/1996 o mjerama razvrgavanja nasljeđa bivših totalitarnih komunističkih režima*
- *Rezoluciji Vijeća Evrope 1481 (2006) o osudi komunističkih zločina*
- *Rezoluciji Evropskog parlamenta od 2. aprila 2009. o evropskoj savjesti i totalitarizmu.“*

Prije prelaska na sljedeću tačku dnevnog reda, predsjedavajući je dao na glasanje prijedlog da se objedini rasprava o tačkama od 14. do 23., jer je riječ o davanju saglasnosti za ratifikaciju amandmana i sporazuma.

Dom je, s 36 glasova „za“ (iz Federacije BiH 25, iz Republike Srpske 11), bez glasova „protiv“ i jednim glasom „suzdržan“, **usvojio** ovaj prijedlog.

#### **Ad.14.-23.**

Predsjedavajući je dao uvodne napomene i otvorio raspravu. Diskutirao je Hazim Rančić.

Dom je, s 36 glasova „za“ (iz Federacije BiH 25, iz Republike Srpske 11), bez glasova „protiv“ i jednim glasom „suzdržan“, **dao saglasnost** za ratifikaciju:

- Sporazuma o saradnji u oblasti turizma između Vijeća ministara BiH i Vlade Republike Kipar, broj: 01,02-05-2-2229/16,
- Sporazuma o grantu između Bosne i Hercegovine i Razvojne banke Vijeća Evrope u vezi s regionalnim programom stambenog zbrinjavanja, broj: 01,02-05-2-2240/16,
- Protokola između Vijeća ministara BiH i Vlade Republike Slovenije o provođenju Sporazuma između Evropske zajednice i Bosne i Hercegovine o readmisiji lica koja borave bez dozvole, broj: 01,02-05-2-2241/16,
- Sporazuma o grantu br. TF0A0656 (Projekat za jačanje finansijskog upravljanja i kontrole) između Bosne i Hercegovine i Međunarodne banke za obnovu i razvoj/Međunarodne asocijacije za razvoj (Svjetska banka), broj: 01,02-05-2-2244/16,
- Sporazuma između Vijeća ministara BiH i Vlade Republike Poljske o zaštiti tajnih podataka, broj: 01,02-05-2-2245/16,
- Sporazuma o osnivanju Fonda Zapadnog Balkana, broj: 01,02-05-2-2246/16,
- Izmjena i dopuna Statuta i njegovog aneksa (Pravila finansiranja) koji je usvojila Generalna skupština od osnivanja Svjetske turističke organizacije (UNWTO), broj: 01,02-05-2-2479/16,
- Ugovora o finansiranju između Bosne i Hercegovine i Evropske investicione banke – *Modernizacija puteva u Federaciji BiH*, broj: 01,02-05-2-2480/16,
- Sporazuma između Bosne i Hercegovine i Vlade Republike Turske o saradnji u vojnoj obuci, broj: 01,02-05-2-2567/16 i
- Sporazuma između Vijeća ministara Bosne i Hercegovine i Vlade Republike Makedonije o kolokaciji diplomatsko-konzularnih predstavništava, broj: 01,02-05-2-2568/16, od 4.10.2016.

Sjednica je završena u 13,55 sati.

Sastavni dio Zapisnika je transkript 36. sjednice Predstavničkog doma.

SEKRETAR  
PREDSTAVNIČKOG DOMA  
**Marin Vukoja**

PREDSEDavajući  
PREDSTAVNIČKOG DOMA  
**Mladen Bosić**